

YONSO KE SONGA YANDI YESU!

Leso sambu na Paki: Na nima Yandi me telema na lufwa, Yesu solulaka ti balonguki zole na nzila ya ke kwenda na Emmaus.

Ndinga ya Nzambi ya ke pesa beto leso yai: Luka 24:13-29, Marko 16:12-13

Kikuma ya Leso:

Na nsuka ya leso yai, mono zola balonguki na mono kubakisa nde, Bible ya mvimba, Kuwakana ya Ntama ti Kuwakana ya Mpa, ke songa Yesu Kristo. Makambo ya nene na kati na yo yonso ikele mpasi Yandi monaka, lufwa ti kutelema na Yandi. Bible ya mvimba ke songa nde Yesu fweti kufwa ti kutelema sambu na Yandi! Mono zola balonguki na mono kubakisa mambu yai, ebuna mono zola bo kumona mfunu kukitula Yandi mambu ya nene na luzingu na bo mpi.

Kuyidika na ntwala ya kulonga:

- Mona verse ya bana fweti longuka na packet ya materiels, to sala visualisation ya verse ya bana ta longuka kutuba. Sonika yo na papier ya ngolo, ti yika foto ya Yesu ti foto ya Bible kana nge kele na yo.
- Sala visualization ya bankunga na papier ya ngolo kana nge mono nde yo ta sadisa bana na nge kuyimba yo, to kana nge mona nde nge lenda sadila bankunga yina mbala mingi na malongi na nge. (Tableau mpi lenda lunga.)
- Sambu na participatio ya bana ya classe, nge kele na mfunu ya carte visual ya baverse 25 ti 26. Kabisa baverse yina na bandambu, phrase par phrase. Sala carte mingi ya ke songa MIKANDA YA MOIZE, ya nkaka ya ke songa BANKUNGA, ti ya nkaka ya ke songa MIKANDA YA BAPROFETE. Tula foto ya Yesu na bacarte yina yonso tatu. Fika foto na kitini ya papier. Kukanga papier na zulu ya konso foto, sadila ribband collant na lweka ya kibakala kaka, na mpila nde nge lenda benda yo kusonga foto ya kele na nsi.
- Tala mbote nde nge me tesa bangindu yonso beto me pesa sambu na participatio ya bana ya classe. Yimba bankunga ti barepetition ritimike beto me songa, sambu nge vanda capable kusala yo kukonda mpasi ti na kikesa yonso. Sala (tesa) batheatre na ntwala ya classe.
- Sola batangi tatu ya lenda tanga kukonda mpasi ti lenda tula expresio mingi na kutanga na bo. Kana mpila ikele, pesa bo partie ya Bible bo fweti tanga na ntwala ntangu ya classe sambu bo lenda sala pratike.

Verse ya kulonguka na ntima: Luka 24:27

Ebuna Yesu tendulaka bo mambu yonso yina ya bo sonikaka sambu na Yandi na mikanda yonso ya Mukanda ya Nzambi, yantika na Mikanda ya Moize ti na mikanda yonso ya broprofete.

Nkunga ya Kwenda Nzila Mosi ti Leso Yai:

Yonso ke Songa Yandi (Ton ya anglais, "Let's talk about Jesus")

(Kuluta mbote kusadila nkunga yai na kati ya leso ti na nima ya leso, kansi na ntwala kuyantika ya leso ve.)

Bible ke songa Yesu

Na luyantiku tii suka

Yo songaka Yandi

Na ntwala Ya' kwisa

Bible ke songa Yesu

Na luyantiku tii suka

Yo ke songa Yandi

Yesu Kristo!

Kuyantika Leso (Introduction):

Keti nge me tanga mukanda, to nge me wa muntu kusonga histoire mosi, to nge me tala filme mosi, to nge me wa malongi mosi na nzo-Nzambi, ti na nima nge me sala yo, nge me yudiyula, "Mambu yai ya mono me tanga to mambu yai ya mono me mona, yo zola kusonga inki?" Keti nge me sala yo?

Mbala mingi, mukanda to filme to histoire to malongi, yo kele na kikuma mosi na yo. Yo kele na theme. Yo zola songa mambu mosi. Mbala ya nkaka na kati na yo, mambu mingi ikele, kansi na nsi-nsi, yo ke songa mambu mosi kaka, mambu mosi ya nene.

Keti nge me kudiyula, "Bible ke songa inki?" Nge fweti vanda na keti-keti diaka ve, sambu Yesu Yandi mosi songaka beto yo ke songa inki. Kangula makutu, kuwa mbote leso ya Bible bubuyai, ebuna nge ta mono Bible ke songa inki.

Kukota na Leso ya Bible:

Leso yai salamaka na nima Yesu me telema na lufwa. Ndambu ya bankento ya landaka Yandi, bo me mona nde maziamu na Yandi vandaka ya kugangula ti yo vandaka vide. Bo me mona wanzio ya me songa bo nde Yesu vandaka kuna ve. Yandi me telema na lufwa. Pierre ti

Every Child Ministries

(Ministères pour Chaque Enfant)

mulonguki ya nkaka me mona nde maziamu vandaka vide, mpi, kansi kuluta mingi na kati ya balonguki ya Yesu, bo vandaka me kwikila ntete ve nde Yandi me telema.

Mambu ya nene kulonga, ti participatio ya bana ya classe:

- Balonguki zole, ntangu bo vandaka kutambula na nzila ya kwenda na Emmaus, bo vandaka kusolula mpila bantu me kanga Yesu, ti bo me fwa Yandi na zulu ya kulunsi.**

Tanga: Luka 24 vs. 13 tii na 14

13 Na kilumbu yo yina kaka, bantú zole na kati na bo vandaka kwenda na bwala mosi, zina na yo Emausi, katuka bwala yina tii Yeruzalemi kele kiteso ya bakilometre kumi na mosi (11 km).

14 Na nzila bo vandaka kwenda kusolula sambu na mambu yina yonso bwaka.

Yula bana:

- Balonguki yonso vandaka na nzila kukwenda wapi? (na bwala Emausi)
- Bo vandaka kusolula inki mambu? (Mambu yina yonso ya bwaka—mpila bo kangaka Yesu ti tulaka yandi na zulu ya kulunsi)

Participatio ya bana ya classe--Ntete, bana ya classe yonso lenda sakana bonso diboko na bo kele Yerusalem, diboko ya nda kele nzila, ti kipaka na bo kele bwala Emmaus. Ebuna, malembe-malembe, bo "tambula" ti misapi zole ya diboko ya nkaka, bonso masapi yina kele balonguki zole ya Yesu ya ke tambula na nzila ya ke kwenda na Emmaus. Bo ke kwenda malembe-malembe, kusonga ne bo ke na mawa sambu Yesu me fwa.

Na nima, sambu na bana ya bambuta, lomba bana zole kuvanda bavolontaire kusala theatre mpila bo zolaka kusolula kana bo vandaka balonguki zole yina.

- Bu bo vandaka kutambula, Yesu Yandi mosi kutanaka ti bo, ebuna Yandi yulaka bo sambu na inki bo vandaka na mawa. Kansi bo zabaka Yandi ve .**

Tanga: Luka 24 vs 15 ti 16

15 *Ntangu bo vandaka kwenda kusolula ti kutula ntembe sambu na mambu yina, yandi mosi Yesu kwisaka penepene na bo, ebuna yandi yantikaka kutambula nzila mosi ti bo.*
16 *Bo vandaka kumona yandi, kansi bo vandaka kubakisa yandi ve.*

Yula bana:

- Nani kwisaka kutambula nzila bo ti bo? (Yesu)
- Keti bo monaka yandi? (Ee, kansi bo bakisaka Yandi ve.)

Participatio ya bana ya classe—

Bana lenda "tambula" misapi na bo na diboko diaka. Mbala yai, bo yika misapi ya nene na misapi zole ya nkaka sambu na kusonga nde Yesu vandaka kutabula sikamosi ti bo.

Sambu na bana ya me yela, sola bana tatu kusala theatre. Bana zole kele kutambula, ebuna bo kele kusolula mawa na bo na mpila bantu kangaka Yesu, pesaka Yandi mpasi ti kufwaka Yandi. Bo solula mpila bo yindulaka nde Yandi ta vanda Mesie. Bu bo kele kusolula, Yesu yantika kutambula sikamosi ti bo. Yandi ke tambula ti bo, ke wa mambu ya bo kele kusolula.

- 3. Bo vandaka na mabanza nde muntu ya kwisaka kutambula sikamosi ti bo fweti vanda muntu ya bwala ya ntama, ebuna nlonguki mosi zina ya Cleopas songaka Yandi nde bo vandaka na mawa sambu bo yindulaka nde Yesu vandaka muntu ya ta gulusa Israele.**

Tanga: Luka 24 vs 17 tii na 21

17 Yesu yulaka bo nde: "Nki mambu yina ya beno ke kwenda kutuba na nzila?" Ebuna bo telamaka, na mawa yonso.

18 Muntu mosi na kati na bo zole, zina ya Kleopasi, yulaka Yesu nde: "Bantu yonso ke zingaka na Yeruzalemi kuzaba mambu yina me bwa kuna na bilumbu yai, ebuna kaka nge mpamba zaba yo ve?"

19 Yesu nde, "Nki mambu?" Bo nde, "Mambu yina bwilaka Yesu, muntu ya bwala Nazareti. Yandi vandaka profete ya Nzambi, na meso ya Nzambi ti na meso ya bantú yonso, yandi vandaka muntu ya ngolo na mambu yina ya yandi vandaka kusala ti ya yandi vandaka kutuba.

20 Bambuta na beto ya banganga-Nzambi ti bambuta na beto ya nkaka, bo pesaka yandi na Pilate sambu yandi zengila yandi ndola ya lufwa ti kutula yandi na zulu ya kulunsi sambu yandi kufwa.

21 Beto vandaka kutula ntima nde yandi muntu ta gulusa bantú ya Israele. Bubu kele mpi kilumbu ya tatu katuka kilumbu yina ya mambu yina kubwaka.

Yula bana:

- Bilumbu ikwa me salama na nima ya bima yina? (Bilumbu tatu).

Participatio ya bana ya classe:

Bana ya classe yonso sala repetition rhythmika yai: (Na ton mosi ya mawa) "Beto yindulaka nde Yesu ta gulusa Israele."

4. Cleopas songaka nde bantima na bo fulukaka na keti-keti ntangu bo waka rapport ya bankento nde maziamu vandaka vide.

Tanga: Luka 24 vs.22 tii na 24.

22 Beto yitukaka mingi sambu na mambu yina ya bankento ya nkaka ke vandaka ti beto kwisaka buzabisa beto. Bo kwendaka na suka-suka na maziamu,

23 kansi bo monaka mvumbi ya Yesu ve. Ebuna bo kwisaka kutubila beto nde: 'Bawanzio me kwisa kumonika na beto; bo me zabisa beto nde Yesu ke na moyo.

24 Bantu ya nkaka na kati na beto kwendaka na maziamu. Bo monaka mambu kaka kiteso mosi mutindu bankento yina tubaka. Kansi yandi, bo monaka yandi ve.'

Kuyula bana:

- Bankento ya kwendaka na suka yonso na maziamu monaka inki? (Maziamu kukangula, mvumbi ya Yesu ve, wanzio)
- Bo monaka nani ve? (Yesu)

Participatio ya bana ya classe: *Bana ya classe yonso songa bo na bo na keti-keti yonso nde, "Bankento tubaka nde Yandi kele na moyo."*

5. Yesu tendulaka bo mutindu Kuwakana ya Mpa songaka mambu na Yandi, mutindu yo songaka mpasi, lufwa ti kutelema na Yandi, yonso na ntwala yo salamaka.

Tanga: Luka 24 vs 25 tii na 27.

25 *Ntangu yai Yesu yantikaka kutubila bo nde: "Beno kele mayele ve! Beno ke kwikilaka nswalu ve mambu yina yonso ya baprofete tubaka!"*

26 *Keti mfunu vandaka ve Mesia na kumona mpasi ti na kubaka lukumu na yandi?"*

27 *Ebuna Yesu tendulaka bo mambu yina ya bo sonikaka sambu na yandi na mikanda yonso yina kele na Mukanda ya Nzambi, yantika na mikanda ya Moize ti na mikanda yonse ya baprofete.*

Yula bana:

- *Yesu tubaka nde bo vandaka nswalu ve kukwikila inki?*
- *Mikanda ya Bible tubaka nde Mesia fweti sala inki?*

Participatio ya bana ya classe: *Repetition rhythmika ya bandinga ya Yesu na verse 26: "Keti mfunu vandaka ve Mesia na kumona mpasi?" (Songa rythme nge mosi. Tanga konso phrase na carte sambu bana lenda landa yo. Na nima, bana ya me yela lenda tanga yo na bacarte phrase par phrase, ti bana yonso lenda tanga konso phrase na nima ya bana yina. Yai ta lomba nde na ntwalla classe yantika, nge sala bacarte visuels ya bana yonso lenda tanga. Mpila yina, bana yonso ta vanda ya kutuba bandinga kiteso mosi.*

6. Bo bendaka Yesu kubikala ti bo mpimpa yina, ti Yandi ndimaka.

Tanga: Luka 24 vs 28 ti 29

28 *Ntangu bo kumaka penepene na bwala yina ya bo vandaka kwenda, Yesu sala bonso muntu ke zola kuluta bwala yina.*

29 *Kansi bantu yina bondilaka yandi nde: "Kwisa kubikala ti beto, sambu ntangu me dinda, mpimpa ke zola kubwa." Yo yina, yandi kwendaka kukota na nzo mosi na bwala yina sambu na kubikala ti bo.*

Yula bana:

- Bo lombaka Yesu kusala inki? (Bikala ti bo na bwala yina mpimpa yina)
- Keti Yandi ndimaka? (Ee, Yandi ndimaka.)

Participatio ya bana ya classe: *Bana ya classe yonso sala bagestes bonso bo zola Yesu kukwisa kubikala ti bo mpimpa yina.*

7. Bu Yesu vandaka na zulu ya mesa ti bo, Yandi bakaka mampa na diboko, ebuna Yandi sakumunaka yo, kaka kiteso mosi na mpila Yandi salaka yo na mpimpa ya Paki—madia ya nsuka ya Yandi kudiaka sikamosi to bo. Mbala mosi, meso na bo kangulaka, ebuna bo zabaka nde yo vandaka Yandi Yesu , kansi kaka na ntangu yina, bo monaka nde Yandi vandaka kuna diaka ve.

Tanga: Luka 24:30-31^g

30 Ntangu yandi vandaka na mesa ti bo, yandi bakaka mampa, yandi pesa Nzambi mersi, yandi zenga mampa bitini-bitini, ebuna yandi pesa bo.

31 Ntangu yai, meso na bo kangukaka, ebuna bo kwisaka kuzaba nde yina kele Yesu. . .

Yula bana:

- Inki ntangu bo zabaka nde yo vandaka Yesu?

Participatio ya bana ya classe: *Lomba bavolontaire tatu na kati ya bana ya classe, bo kwisa na ntwala ya classe, ebuna bo sala theatre ya partie yai ya histoire yina. Yesu ke vanda na kati-kati ya balonguki zole. Yandi baka mampa, ye Yandi yantika kusakumuna yo. Nswalu balonguki zole yina bakisa nde yo kele Yesu. Bu bo kele kusala ti kutuba bonso bo kele na surprise ti excitation, bo tala na direction ya nkaka kaka ntangu fioti. Ntangu yo yina, mwana ya ke sala partie ya Yesu, yandi telema ti yandi basika (yai kele mpila beto ke songa nde bo monaka Yesu diaka ve.)*

8. Balonguki bakisaka mambu ya Yesu vandaka kulonga bo ntangu bo vandaka kutambula sikamosi na nzila. Bo bakisaka nde Bible ya mvimba vandaka yonso kutadila ti kusonga Yandi Yesu

Tanga: Luka 24 vs 32

Ebuna bo yantikaka kutuba bo na bo nde: "Si ntima na beto vandaka kubula sambu na kiese, ntangu yandi vandaka kwenda kusolula ti beto na nzila, ti ntangu yandi vandaka kutendula beto mambu yina kele na Mukanda ya Nzambi."

Yula bana:

- Bo vandaka na kiese na inki? (Na mpila Yandi tendulaka bo mambu yina kele na Mukanda ya Nzambi.)

Participatio ya bana ya classe: Sola batangi zole ya zaba kutanga mbote-mbote, bo tanga verse yai na mpila bonso drame to theatre. Mwana mosi sala partie ya mutubi, yandi tanga kitini ya ntete ya verse. Mwana ya zole songa inki bo tubaka bo na bo, ebuna bana ya nkaka tuba yo diaka ti diaka bo na bo.

9. Bo balulaka nswalu, ebuna bo vutukaka na Yerusalem, ye bo songaka balonguki ya nkaka nde Yesu me telema. Bo zabaka yo, sambu bo me mona Yandi ti bo me solula ti Yandi.

Tanga: Luka 24 vs 33 tii na 35

33 Na ntangu yo yina kaka, bo telamaka, ebuna bo vutukaka na Yeruzalem. Bo kwendaka kukuta balonguki yina kumi na mosi me kutakana ti banduku na bo.

34 Bantu yina ya bo kwendaka kukuta tubilaka bo nde: "Ya kieleka, Mfumu Yesu me telama na lufwa! Simoni me mona yandi!" 35 Bantu yina zole mpi zabisaka bo mambu yina ya bo monaka na nzila ti mutindu bo zabaka Yesu ntangu yandi vandaka kuzenga mampa.

Yula bana:

- Balonguki yai zole kutananaka ti nani? (Balonguki kumi na mosi)
- Bo songaka bo inki? (Ya kieleka Mfum Yesu me telama na lufwa.)
- Nani monaka yandi? (Simoni)

Participatio ya bana ya classe: Bana yonso sala bo kele balonguki ya me bakisa kaka ntangu yina nde kieleka, Yesu me telema, Yandi kele na moyo. Bo baka ntinu kaka na sika bo ikele, na nzila bo ke tula makelele mingi. Longi, nge songa bana nde ntangu yai, bo me vutuka na Yerusalem, ebuna bo kanga, bo baka ntinu diaka ve. Na nima, bo yonso tuba na ndinga mosi ya ngolo nde, "Kieleka, Mfumu Yesu me telema!" Nge longi songa makelele ti bageste ya excitation mingi, ebuna bana ta landa nge.

10. Bu bo vandaka kutuba, Yesu kwisaka ye Yandi telemaka na kati na bo, kusonga nde Yandi vandaka na moyo, Yandi vandaka ve kaka mpive. Kusonga yo, Yesus bakaka madia ti Yandi kudiaka na meso na bo.

Tanga: Luka 24 vs 36 tii na 43

36 Ntangu bo vandaka ke tuba kaka sambu na mambu yina, Yesu yandi mosi kwisaka kubasika na kati na bo. Yandi nde: "Mbote na beno!"

37 Bo vandaka kutekita na boma, sambu na ngindu na bo, bo banzaka nde bo me mona diabulu.

38 Kansi yandi yulaka bo: "Sambu na inki mabanza na beno me kuma kisakasaka? Sambu na inki beno ke na ntima zole?

39 Beno tala maboko na mono ti makulu na mono: mono yandi yai Yesu. Beno kwisa kusimba mono, beno tala mono; sambu diabulu ke vandaka na misuni to mikwa ve, kansi mono ke na yo mutindu beno ke mona."

40 Ntangu yandi tubaka mambu yina imene, yandi songaka bo maboko na yandi ti makulu na yandi.

41 Bo monaka mpila ya kukwikila mambu yina ntete ve, sambu bo vandaka na kiese mingi, bo vandaka kuyituka . Yo yina, yandi yulaka bo nd: "Keti beno ke na kima ya kudia awa?"

42 Bo pesaka yandi kitini mosi ya mbisi ya masa ya kuyoka.

43 Yandi bakaka yo, ebuna yandi diaka yo na meso na bo.

Kuyula bana:

- Nani kwisaka kumonika na kati na bo? (Yesu Yandi mosi.)
- Yandi tubaka inki na bo ntete? (Mbote na beno.)
- Sambu na inki bo vandaka na boma? (Bo banza bo me mona diabulu.)
- Yesu songaka bo kusala inki sambu bo kwikila? (Simba yandi, tala maboko na yandi.)
- Yandi kudiaka inki na meso na bo? (Kitini ya mbisi ya masa ya kuyoka)

Participatio ya bana ya classe: Sola mwana mosi kusala bonso yandi kele Yesu ya kutelema. Yandi telema, ebuna yandi tuba nde, "Bika ngemba kuvanda na beno." Bana ya class ya nkaka sala bonso bo ke na boma sambu bo ke yindula nde yandi fweti vanda mpeve.

Mwana ya ke sala bonso Yesu tanga bandinga ya verse 38b ti 39, ye yandi songo bo ya nkaka maboko ti makulu na yandi. Bo yonso ya nkaka sala bonso bo kele kuyituka.

Mwana ya ke sala bonso Yesu yula bo ya nkaka kana bo kele na madia kuna. Bana zole sala bonso bo ke pesa Yandi kitini ya mbisi ya masa, ti kitini ya bwiki. Yesu baka yo, ebuna yandi kudia na meso na bo.

- 11. Yandi kangulaka mabanza na bo kuzaba nde Bible songaka na ntwala nde Yandi fweti mona mpasi, yandi fweti kufwa ebuna telema na lumbu ya tatu Yandi songaka bo mambu yai bu Yandi vandaka sikamosi ti bo, kansi bo bakisaka yo ve.**

12. Tanga: Luka 24 vs 44 tii na 46

44 Na nima yandi tubilaka bo nde: "Yai kele mambu ya mono tubilaka beno, ntangu mono vandaka kaka ti beno, nde mambu yina yonso ya bo sonikaka sambu na mono na mikanda ya Bansiku ya Moize, na mikanda ya baprofete, ti na mukanda ya Bankunga, mambu yina fweti kulunga.

45 Ntangu yai Yesu pesaka bo mabanza ya mbote sambu bo bakisa mambu yina kele na Mukanda ya Nzambi.

46 Ebuna yandi tubilaka bo nde: "Mambu yina ya bo sonikaka na Mukanda ya Nzambi, yo yai: Mesia fweti fwa, ebuna yandi fweti telama na lufwa na kilumbu ya tatu.

Yula bana:

- Na inki partie ya Bible bo sonikaka sambu na Yesu Mesia? (Na bapartie yonso.)
- Keti bapartie ya Bible ikele ya ta lunga ve na mpila yo me sonika? (Ikele ve. Yonso fweti lunga bonso bo me sonika yo.)
- Bible songaka na ntwala nde Mesia fweti sala inki? (Yandi fweti kufwa, ebuna yandi fweti telama na lufwa na kilumbu ya tatu na nima.)

Participatio ya bana ya classe:

Bazwif kabisaka Kuwakana ya Ntama na bandambu tatu. Bu nge tuba konso kitini, pesa mwana carte ya nene ya kele na kitini yina ya kusonika na zulu na yo. (Konso carte kele na foto ya Yesu ya kele kufikama na kitini ya papier.) Bandambu tatu yina vandaka 1. Mikanda ya Moize (mikanda tanu ya ntete ya Bible ya beto—Kuyantika tii na Kulonga), 2. Bankunga, ye 3. Mikanda ya baprofete. Bandambu yai tatu kangama kusala mukanda mosi—Kuwakana ya Ntama. Yesu tubaka nde Mikanda ya Moize vandaka kutuba ya inki? Ee, bo tubaka sambu na Yandi Yesu (Lomba mwana kubalula papier, sambu foto ya Yesu lenda monika.)

Bankunga tubaka ya inki mambu? Ee, bo mpi tubaka mambu ya Yesu. (Lomba mwana kubalula papier na carte ya ke tuba Bankunga, sambu foto ya Yesu lenda monika.) Mikanda ya baprofete, yo tubaka inki? Ee, bo mpi tubaka sambu na Yesu. (Lomba mwana ya nkaka kubalula papier na carte ya ke tuba Mikanda ya Baprofete, sambu foto ya Yesu lenda monika.) Ata na ntwala Yesu kwisaka, Kuwakana ya Ntama yonso songaka nde Yandi ta kwisa kuvutuka!

Kumanisa leso: Yimba diaka nkunga, "Yonso ke songa Yandi"

Devoir sambu na bana ya me ndima Yesu:

Yesu kele muntu central na kati ya Bible. Na luyantiku tii na nsuka, Bible ke songa kukwisa na Yandi, lufwa na Yandi, ti kutelema na Yandi. Na mabanza ya Nzambi, Yesu ke mambu me luta nene na histoire yonso ya bantu.

Keti Yandi me luta mfunu na luzingu na nge? Keti yandi kele mfunu ya kieleka na mabanza na nge? Kana nge me pusa Yandi na Iweka, nge lenda songa Yandi bubuyai nde nge zola Yandi kubaka sika bonso kitu ya kimfumu na luzingu ya nge. (Longi, sala ntangu ya lombilu ti bana sambu na mambu yina.)

Binga bo ya me yamba Yesu ntete ve, bo kwisa na Yesu:

Mbala ya nkaka nge zaba ve kana ya kieleka, Yesu me gulusa nge. Ata mpila yina, zaba nde katuka na luyantiku, Nzambi me vanda na lukanu kutina Yandi, ti Yandi me sila mpi kutinda Yandi, yonso sambu Yandi lenda gulusa nge na masumu na nge. Kana nge me yilama na ntima kutuba "ee" na Yesu, nge lenda kaka binga Yandi na lombilu. Songa Yandi nde nge zola Yandi kuvanda mvulusi na nge mvu ya mvu. Lomba Yandi kukwisa kukota luzingu na nge.

(Longi ya ecodim, songa bana sika mosi ya nge lenda kutana ti bo ya zola samba sambu Yesu kota na luzingu na bo.)

(Kana nge ke longa na nzo-nkanda publika, songa bana inki mutindu kusamba kuyamba Yesu, ti songa bo nde konso muntu ya zenga makambu yina, bo lenda samba bo mosi, ebuna bo lenda sonika zina ti bandinga "Mono yambaka Yesu" na kitini ya papier. Bo nata papier yina, bo pesa yo na nge na mposo ke kwisa to konso ntangu bo zola.

====

NSUKA YA LESO

====

NB: Atasio, longi!

Ntangu yai, nge me manisa kusadila baleso yai. Baleso ya mpa ke kinga nge na Centre des Materiels, sika nge me defa baleso yai. Mabundu ya nkaka mpi ke kinga kudefa baleso yai sambu bo mona mpila kulonga bana na bo. Ntangu yai, vutula materiels yonso na sachet ti vutula yonso na Centre des Materiels ya MCE. Merci mingi sambu na collaboration ya nge !